

REGLUGERÐ KSÍ

um áfrýjunardómstól KSÍ

I. kafli.

ALMENN ÁKVÆÐI

1. gr.

Gildissvið

- 1.1. Reglugerð þessi er sett með stoð í grein 36.1. laga Knattspyrnusambands Íslands. Hún gildir um öll áfrýjunarmál innan vébanda KSÍ.

2. gr.

Lögsaga og hlutverk

- 2.1. Áfrýjunardómstóll KSÍ skal hafa fullnaðarlögsögu yfir þeim málum, sem heimilt er að áfrýja og koma upp innan vébanda Knattspyrnusambands Íslands og varða lög og reglur þess eftir því sem við á. Skal áfrýjunardómstóll KSÍ byggja niðurstöður sínar á lögum og reglugerðum KSÍ.
- 2.2. Áfrýjunardómstóllinn tekur mál til endurskoðunar eftir áfrýjun þess og getur tekið ákvörðun um viðurlög samkvæmt lögum KSÍ, reglugerð þessari og öðrum reglugerðum KSÍ gagnvart aðildarfélögum, forráðamönnum, leikmönnum, þjálfurum, starfsmönnum, umboðsmönnun í knattspyrnu og öðrum þeim, sem eru innan vébanda aðildarfélaga Knattspyrnusambands Íslands vegna brota þeirra á lögum KSÍ, reglugerðum KSÍ og öðrum reglum.
- 2.3. Áfrýjunardómstóll KSÍ er æðsti dómstóll innan knattspyrnuhreyfingarinnar.
- 2.4. Nefndin hefur aðsetur á skrifstofu Knattspyrnusambands Íslands, Laugardalsvelli, 104 Reykjavík. KSÍ birtir skipan dómstólsins hverju sinni.

3.gr.

Skipan og hæfi

- 3.1. Áfrýjunardómstóll KSÍ skal skipaður 3 löglærðum dómurum og 5 löglærðum til vara.
- 3.2. Dómarar skulu kosnir á reglulegu knattspyrnuþingi til setu fram að næsta reglulega knattspyrnuþingi og dómstóllinn kys sér forseta.
- 3.3. Dómstóllinn starfar samkvæmt reglugerð þessari og skulu a.m.k. þrír dómarar fara með mál og ákveður dómsformaður hverjir af hinum reglulegu dómurum fara með málið.
- 3.4. Dómari er vanhæfur að fara með mál ef:
- Hann er aðili máls eða fyrirsvarsmaður aðila.
 - Hann hefur gætt hagsmuna aðila varðandi efni málsins eða veitt aðila leiðbeiningar um það, umfram skyldu.
 - Hann hefur borið eða verið kvaddur til að bera vitni um atvik málsins af réttmætu tilefni eða verið mats- eða skoðunarmaður um efni málsins.
 - Hann er eða hefur verið maki aðila, skyldur eða mægður aðila í beinan legg eða tengdur aðila með sama hætti vegna ættleiðingar.
 - Hann tengist eða hefur tengst fyrirsvarsmanni eða málflytjanda með þeim hætti er segir í 3.4.d).
 - Hann tengist eða hefur tengst vitni í málinu með sama hætti og segir í 3.4.d).
 - Fyrir hendi eru önnur atvik eða aðstæður sem eru fallnar til þess að draga óhlutdrægni hans með réttu í efa, m.a. ef hann eða náinn skyldmenni eru félagsbundin aðila máls eða hann vanhæfur af öðrum ástæðum.
- Eigi er þó um vanhæfi að ræða ef þeir hagsmunir, sem málið snýst um, eru það smávægilegir, eðli málsins er með þeim hætti eða þáttur dómara í meðferð málsins er það lítilfjörlegur að ekki er talin hætta á að ómálefnaleg sjónarmið hafi áhrif á ákvörðun.

- 3.5. Stjórn KSÍ skal skipa dómara í áfrýjunardómstólinn til meðferðar einstaks máls ef tilskilinn fjöldi næst ekki úr kjörnum dómurum og varadómurum vegna vanhæfis þeirra.

II. kafli. **ÁFRÝJUN**

4. gr.

Áfrýjun til áfrýjunardómstóls KSÍ

- 4.1. Heimilt er að áfrýja til áfrýjunardómstóls KSÍ öllum úrskurðum aga- og úrskurðarnefndar í kærumálum.
- 4.2. Almennt verður úrskurðum aga- og úrskurðarnefndar KSÍ í agamálum ekki áfrýjað til áfrýjunardómstóls KSÍ nema í eftirfarandi undantekningartilfellum:
- a). Úrskurði aga- og úrskurðarnefndar KSÍ um þriggja leikja leikbann eða þyngri refsingu. Leikbanni sem leikmaður fær sjálfkrafa, skv. 12. grein reglugerðar KSÍ um aga- og úrskurðarmál verður ekki áfrýjað. Fáir leikmaður þyngri refsingu en sem nemur sjálfkrafa leikbanni þarf þynging refsingar að vera tveir leikir eða meira til þess að máli verði áfrýjað. Einungis er heimilt að áfrýja þeim hluta refsingar sem lítur að hinni þyngdu refsingu í þessum tilvikum.
 - b). Úrskurði aga- og úrskurðarnefndar KSÍ um viðurlög og refsingar sem nema hærri fjárhæð en 50.000.
 - c). Úrskurði nefndarinnar á grundvelli greinar 12.9.c) í reglugerð KSÍ um aga- og úrskurðarmál.
 - d). Úrskurði nefndarinnar um heimaleikjabann á grundvelli greinar 12.9.d) í reglugerð KSÍ um aga- og úrskurðarmál.
 - e). Áfrýjunardómstóll KSÍ getur heimilað áfrýjun annarra úrskurða í agamálum í undantekningartilvikum ef dómstóllinn telur sérstakar ástæður fyrir hendi. Skrifleg beiðni þar að lútandi skal send formanni dómsins inna tveggja virkra daga frá því úrskurður aga- og úrskurðarnefndar var kveðinn upp. Beiðni um áfrýjun skal vera rökstudd og með henni skulu fylgja afrit af úrskurði aga- og úrskurðarnefndar og önnur gögn ef við á. Formaður áfrýjunardómstóls skal tilkynna aðilum eins fljótt sem verða má um hvort áfrýjun sé heimil á grundvelli sérstakra ástæðna.
- 4.3. Frestur til að áfrýja máli til áfrýjunardómstóls KSÍ skal vera 3 dagar frá því að úrskurður aga- og úrskurðarnefndar var kveðinn upp og skulu almennir frídagar ekki taldir með.

5. gr.

Áfrýjun til áfrýjunardómstóls ÍSÍ

- 5.1. Heimilt er að áfrýja til áfrýjunardómstóls ÍSÍ þeim málum áfrýjunardómstóls KSÍ, sem varða Ólympíusáttmálann eða túlkun á honum. Áfrýjunardómstóll ÍSÍ ákveður í þessum tilvikum hvort kæruatriði séu þess eðlis að hann eigi um þau að fjalla. Ef áfrýjunardómstóll ÍSÍ hafnar kæruatriðum áfrýjanda er málinu þar með endanlega lokið.

6. gr.

Endanleg niðurstaða

- 6.1. Dómur áfrýjunardómstóls KSÍ er endanlegur og bindandi fyrir málsaðila. Verður þeim dómi ekki skotið til annarra dómstóla innan íþróttahreyfingarinnar, sbr. þó grein 5.1. Jafnframt skuldbinda aðilar sig til að skjóta ágreiningi sem dæmt hefur verið um af áfrýjunardómstól KSÍ ekki til almennra dómstóla.

III. kafli.

MÁLSMEDFERÐARREGLUR

7. gr.

Almennar málsmeðferðarreglur

- 7.1. Sá aðili sem hyggst áfrýja máli skal senda áfrýjunardómstóli KSÍ sérstakt áfrýjunarskjal þar sem um er að ræða greinargerð þar sem lýst er þeim sjónarmiðum sem áfrýjandi byggir á ásamt gögnum málsins.
- 7.2. Ný gögn skulu ekki lögð fram fyrir áfrýjunardómstólnum. Vitna- og aðilaskýrslur skulu ekki fara fram. Dómstólnum er þó heimilt að víkja frá þessum ákvæðum þegar sérstaklega stendur á.
- 7.3. Málsmeðferðarreglur sem fram koma í II. kafla í reglugerð KSÍ um aga- og úrskurðarmál skulu gilda um áfrýjunardómstól KSÍ eftir því sem við á.

IV. kafli.

DÓMAR ÁFRÝJUNARDÓMSTÓLS KSÍ

8. gr.

Uppkvaðning dóma og gildistaka

- 8.1. Dómur dómstólsins skal kveðinn upp svo fljótt sem verða má eftir að gagnaöflun telst lokið og málið tekið til dóms og leitast skal við að kveða upp dóm innan viku frá dómtöku málsins.

9. gr.

Efni dóma

- 9.1. Dómar skulu vera skriflegir og rökstuddir og skal eftirfarandi koma fram:
 - a) Hverjir séu aðilar máls.
 - b) Kröfugerð og málavaxtalýsing.
 - c) Helstu málsástæður og röksemdir málsaðila.
 - d) Rökstuðningur og niðurstaða dómstólsins.
 - f) Sératkvæði minnihluta, ef um slíkt er að ræða.
- 9.2. Dómur skal undirritaður af þeim, sem þátt tóku í afgreiðslu viðkomandi máls. Afl atkvæða ræður úrslitum máls. Ef dómarar er ósammála um niðurstöðuna skal þess getið sérstaklega.

10. gr.

Birting dóma

- 10.1. Dómstóllinn sendir málsaðilum staðfest endurrit dóms jafnskjótt og hann hefur verið kveðinn upp með tölvupósti til formanns knattspyrnudeildar/ráðs, þess aðila, sem félagið hefur tilkynnt KSÍ um eða áfrýjanda sem getið er í áfrýjunarskjali og greinargerð. Áhætta af mistökum við afhendingu tölvupósts hvílir alfarið á móttakanda.
- 10.2. Dómur skal einnig birtur á heimasíðu KSÍ eftir að hann hefur verið birtur aðilum málsins.
- 10.3. Við birtingu dóma skal gæta nafnleyndar um þá sem þar eru greindir ef sérstök ástæða er til, svo sem þegar um er að ræða viðkvæm persónuleg málefni, málefni barna og/eða málefni sem geta verið refsiverð lögum samkvæmt. Þegar nöfnum er haldið leyndum skal jafnframt afmá önnur atriði úr dómi sem geta tengt aðila eða aðra við málið.

VI. kafli.

ÝMIS ÁKVÆÐI.

11. gr.

Fundargerðir og dómar

- 11.1. Við áfrýjunardómstólinn skulu haldnar sérstakar fundargerðir. Við fyrirtöku máls skal rita skýrslu í fundargerð um það sem fram fer, hvaða gögn eru lögð fram, hverjir mæta í máli og hvað er afráðið um rekstur máls. Í fundargerð skal jafnframt færa þær ákvarðanir sem teknar eru í málinu. Efni fundargerðar skal að jafnaði ekki birt opinberlega.
- 11.2. Dómstóllinn skal einnig halda sérstaka skrá yfir dóma sem kveðnir hafa verið upp. Dómar áfrýjunardómstóls KSÍ skulu vera aðgengilegir og birtir á heimasíðu KSÍ.

12. gr.
Niðurfelling refsingar

- 12.1. Knattspyrnuþing er heimilt með minnst 2/3 greiddra atkvæða að fella niður refsingu eða veita dæmdum aðila full réttindi að nýju innan knattspyrnuhreyfingarinnar.

13. gr.
Gildistaka

- 13.1. Reglugerð þessi er sett með stoð í 20. og 36. grein laga KSÍ og öðlast þegar gildi, sbr. 20. grein þeirra laga.

Samþykkt af stjórn KSÍ 27. mars 2025